

OSTERØY KOMMUNE
RÅDHUSET
5282 LONEVÅGDato: 22.02.2017
Vår ref.: 2017/1073-2
Saksbehandlar: jomragn
Dykkar ref.: 17/117 - 17/1021

Høyringsmerknader til endring av forskrift om minsteareal for jakt på hjort i Osterøy kommune

Vi viser til brev datert 31.01.2017, der kommunen høyrer på endring av minsteareal for jakt på hjort i Osterøy kommune. Vi har vurdert høyringsforslaget ut frå fylkeskommunen sitt hovudansvar på regionalt nivå for hjorteforvaltninga, primært i rolla som tilretteleggar og koordinator.

Høyringsframlegget

Det er føreslått inndeling av kommunen i fem forskjellige minsteareal, kalla sone 1-5. Det er éi sone mindre enn i gjeldande forskrift frå mai 2009. Forslaget er meint å gje ei betre tilpassing til forskjellane i beitegrunnlag og hjortetettleik, skadepress og påkjøringar m.m.. Inndelinga går frå sone 1 og 2, som stort sett er kjerneområde for hjort og område med aktiv og intensiv jordbruksdrift, til sone 5, som i hovudsak er område med høgareliggjande fjellområde nord på Osterøy.

Vurdering

Fastsetting av minsteareal er rekna som det viktigaste verkemiddelet i reguleringa av bestandsstorleik, jf. rettleiar M-478 til Hjorteviltforskrifta. Hovudregelen er eitt minsteareal per kommune, men det kan fastsetjast forskjellige minsteareal i ulike delar av kommunen dersom det er vesentleg forskjell på beitegrunnlag, bestandstettleik eller skadepress. I slike tilfelle bør grensene mellom områder med ulikt minsteareal følgje klare skiljelinjer i terrenget. Tilsvarande kan kommunen unntaksvis vurdere differensiert minsteareal mellom område med vesentleg variasjon i bonitet og produktivitet.

Dei føreslåtte endringane i minsteareal er tenkt å gje betre tilpassing og dermed større fleksibilitet i den lokale avskytinga. Det føreslåtte minstearealet på 200 dekar i Mjeldalen og Rollandsområdet er svært lågt, men forståeleg ut frå tal i hjorteviltregeisteret. Til dømes har fellingsprosenten i valdet Mjeldalen kvart år dei siste 10 åra har vore på 100, sjølv med maksimalt fråvik frå gjeldande minsteareal på 300 dekar dei siste fem åra. Det føreslåtte minstearealet på 200 dekar vil dessutan berre gjelde for relativt små område. Mjeldalen er nok eit område der hjortetettleiken kan bli svært høg.

Vaksdal kommune høyrer samtidig på endring av minsteareal i Vaksdal kommune, og føreslår eit minsteareal på 1400 dekar for kommunen sitt areal på Osterøy. Ut frå hjorteviltforskrifta § 4 (Interkommunalt samarbeid), bør dei to kommunane samarbeide om felles mål for hjorteforvaltninga på tvers av kommunegrensa på Osterøy, medrekna vurdering av storleik på minsteareal.

I rettleiinga til hjorteviltforskrifta, er bestandsplanlegging, i tillegg til minstearealet og avvik frå minstearealet, nemnt som eit verkemiddel for regulering av bestandsstorleiken. I hjorteforvaltninga skal bruk av bestandsplan vere hovudregelen, noko som også gir fleksibilitet for jaktrettshavarane i avskytinga. Ei av

kommunen sine oppgaver er å stimulere til etablering av hensiktsmessige vald, bestandsplanområder og bestandsplaner, uavhengig av kommunegrenser. I prosjektet «Hordahjort» (2008-2013) vart heile øya Osterøy føreslått som eitt bestandsplanområde. I 2016 fekk kommunen søknad om godkjenning av Osterøy bestandsplanområde og bestandsplan for området for perioden 2016-2018. Slik søknad krav enkeltvedtak etter forvaltingslova. Det følgjer at kommunen snarast bør ta stilling til kva som er eigna område for bestandsplan. Føresett overgang til meir reell bestandsforvaltning av hjort på Osterøy, vil det kanskje ikkje vere behov for like detaljert inndeling av minsteareal i kommunen.

Konklusjon

Ut frå høyringsframlegget synest føreslåtte endringar i minsteareal å vere bra. For å leggje til rette for endå betre hjorteforvaltning på Osterøy, oppmodar vi i tillegg kommunen om å vere pådrivar for bestandsforvaltning.

Sølve Dag Sundbø
klima- og naturressurssjef

Jomar Ragnhildstveit
seniorrådgjevar

Brevet er godkjent elektronisk og har derfor inga underskrift.